




## «ԵՍ ԱՍԱՑԻ, ՈՐ ԴՈՒՔ ԿՀԱՂԹԵՔ»

### ԽՈՍՔ ՀՐԱԺԵՇՏԻ

«Ինչ լավ է, որ հայերս քրիստոնյա ենք»:

ՎԱԶԳԵՆ Ա.

Աստված ողորմած եղավ մեր ժողովրդի հանդեպ. 1955 թվականին Հայաստանյայց Առաքելական Եկեղեցու 130-րդ Հայրապետն ընտրվեց և օծվեց Վազգեն Առաջինը, և Տերը լուսավորեց ընտրյալի ճամփան մինչև վախճանը Սուրբ Գահի վրա:

Անչափ դժվար է գրել արդեն իր կենդանության օրոք երևացող, ազգային Մեծ հոգևոր և աշխարհիկ գործչի մասին, անցյալ կատարյալով, երբ աչքերիդ առջև դեռ նա կենդանի է, շնչում է, քայլում, խոսում. ավաղ դառն է իրականությունը:

Երեսունինը տարի Մեր Լուսահոգին գահակալը եղավ հայոց հավատի Սուրբ Աթոռին: 2001 թվականին նշվելու է 1700-ամյակը պետականորեն քրիստոնյա հայ ժողովրդի, այդ թվականի կողքին, 39 տարին կաթիլ էլ չէ, բայց Հայրապետների շարքում շատ քչերին է բախտ վիճակվել 39 տարի անընդմեջ կրել Հայոց հավատի առաջին խաչն ու գավազանը:

Եվ երբ այսօր արդեն մեզ հետ չէ մեր սիրելի Հայրապետը, մեր առջև ավելի հստակ ու լուսավոր կանգնում է նրա ազնիվ, հզոր ու առաքինի կերպարը իր ողջ մեծությամբ՝ իր կատարած բազում հոգևոր և աշխարհիկ գործերով, գերելով մեզ իր զարմանահրաշ գործունեությամբ, մի գործունեություն, որն իրագործվեց 1955-ից մինչև 1988 ամբողջատիրական մի պետական կառուցվածքի մեջ, երբ կրոնը ոչ միայն արգելված էր, այլ նաև տրոհված, ավերված ու անարգված, և հազիվ բարախում էր Հայ Առաքելական Եկեղեցու զարկերակը:

Ուրեմն, ինչ հզոր հավատ, կամք, իմաստություն, կորով և համատույնություն պետք է ունենար Հայոց Հայրապետը՝ հաղթահարելու համար պատ-

նեշները, նորից կյանքի ու գործունեության կոչելու Հայոց Քրիստոնյա ոգին, սակավ հավատացյալների և սակավ սպասավորների առկայությամբ:

Այս ամենը ոտքի կանգնեցնելու համար ամենից առաջ և ամենից վեր պետք էր ունենալ մարդկային առաքինող մի հմայք, հմայք, որը գործում է խոսքից, իմաստությունից, գործից առաջ, այդ հմայքն ուներ Հայոց Հայրապետը, այն տրված էր ի վերուստ և շռայլորեն. մի՞թե այս չէր, որ հնարավոր դարձրեց իրեն անմիջապես նվիրյալներով շրջապատելն ու հավատ հաղորդելը: Ում դիմում էր Վեհափառը, ում կարիքն ուներ Վեհափառը, մերժում չկար, նույնիսկ կոմունիստական վարչակազմի ընտրյալներն անգամ «ծածուկ» դարձան հարգող և օգնող գործակիցներ, իսկ վտանգավոր պահերին՝ չգիտցող ու չհասկացող ձևացան:

Այսպիսով սկսվեց անժամանակ, անվերջանալի մի աշխատանք Մայր Աթոռում մինչ այսօր, որն իր բազում ասպարեզներով նախադեպը չունի:

Պետք էր ամենից առաջ վերադարձնել կամ վերակենդանացնել Հայ Եկեղեցու՝ հայ ոգին, հայկական էությունը, որի շուրջը միայն կարող էր զարգանալ, հզորանալ և ծաղկել մեր Քրիստոնյա ժողովուրդը, որն ապրում էր զգուշության, վախի զգացողության մեջ:

Մեկ թերթի էջերը չեն բավականացնի, եթե միայն թվարկենք Վեհափառ Հոր կատարածը, բայց պարտավոր ենք ընդգծել կարևորը:

Վազգեն Առաջինին հաջողվեց ոչ միայն ի մի բերել Հայրենի հողի վրա ցաքուցրիվ Հայ Եկեղեցու հարստությունները, ոչ միայն բարեկարգեց, վերակառուցեց, ետ ստացավ ժամանակին գրավված եկեղեցական մշակութային արժեքները, այլև կարողացավ լավագույնս պահպանելու և պրոպագանդելու միջոցով այն արժանացնել նաև օտարականների ճանաչմանը: Կենդանացավ նաև կապը քույր Եկեղեցիների, եկեղեցապետների միջև, սկսեց լայնանալ ճանաչումը և հարգանքը Հայ Եկեղեցու և նրա կրոնապետի: Նա իր այցերով գտավ ու կապ հաստատեց Հայ Եկեղեցուն և ազգին նվիրված հայ և ալյազգի գործիչների հետ և որ ամենակարևորն էր, Լուսավորչի հավատի Լույսը հասցրեց օտարության մեջ դեգերող, արհեստականորեն հայրենիքից կտրված մեր հայրենակիցներին, և Էջմիածինը դարձավ միակ հուսալի կապը Հայրենիքի հետ միլիոնավոր հայերի համար: Եվ ճիշտ այդ տարիներին իր օգնությամբ հայրենի հող վերադարձվեց բազում-բազմաթիվ գանձեր՝ լինի մատյան, տպագիր գիրք, նկար, ասեղնագործություն, փաստաթուղթ կամ մի այլ մասունք, առանց որի հայ ոգու դեմքը կատարյալ չէր լինի:

Ամենայն Հայոց Հայրապետն իր իմաստուն քաղաքականությամբ օր-օրի ավելացնում էր հայ կրոնական դասի նվիրյալների թիվը, որոնք կատարելագործվում էին աշխարհի կրոնական բարձրագույն ուսումնական հաստատություններում և արդյունքն է այն, որ բազում թեմերի առաջնորդները սաներն են Ս. Էջմիածնի և Վեհափառ Տիրոջ: Այսօր նրանցից շատերը ծնկի եկած Սուրբ Մահնի առջև, իրենց որդիական մեղան են հայցում:

Ավելորդ եմ համարում երկար կանգ առնել նրա խաղաղասիրական գործունեության, ջանքերի վրա, միայն ասենք, որ քաջ գիտակցում էր, որ ապահովելով աշխարհի ժողովուրդների խաղաղությունը, ապահովում էր ամենից առաջ իր տառապյալ ժողովրդի խաղաղությունը:

Ով չգիտե՝, թող տեղյակ դառնա, որ Ամենայն Հայոց Կաթողիկոս Տեր Տեր Վազգեն Առաջինը Մայր Աթոռում կատարեց այն, ինչ կատարում էին Հոռմում Կաթողիկ Եկեղեցու Պապերը մշակույթի ասպարեզում՝ Վերածննդի

տարիներին: Թվարկման անհրաժեշտություն չկա, արվածը իրեղեն է և շոշափելի:

Վեհափառ Հոր հայրենասիրությունը սահման չունի: Ընդունված է առել, որ ոգին ավելի ծանր է, քան մարմինը մարդու, իսկ եթե մեզ հաջողվեք ժողովել, կշռել հայրենասիրությունը Հայրապետի, ես հավատացած եմ, այն հազարապատիկ ծանր կլինի որոց:

Այդ ապացուցվեց նրա ողջ գործունեության ընթացքում և հատկապես շոշափելի դարձավ 1988-ից ի վեր, երբ շնչում, քայլում, գործում էր մի կծիկ դարձած, երևույթների ամեն օրով, ժամով, վայրկյանով պատրաստ էր իր կյանքով պաշտպանելու իր ժողովրդի արդար պայքարն ու պահանջը, կարդացեք նրա կոնդակները, քարոզները, կոչերը, հեռագրերը, նայեցեք նրա՝ ուսուցիչ և հեռուստատեսային ելույթները և կզգաք, թե որքան խորը, իմաստավորված, այդ պահին անհրաժեշտ խոհեր, պատվիրաններ, պահանջներ, նույնիսկ հրամաններ ունի Վեհափառը իր ժողովրդի պայքարի և կենացմահու ճակատագրական ժամերին:

Եվ նրա գործը փառավորվեց փառքով. նա եղավ այն երջանիկ Հայոց Հայրապետը, որի աջով բարձրացավ Էջմիածնի Սուրբ Խաչը օրհնելու համար ազատ ու անկախ Հայաստանի Հանրապետության հռչակումը: Նա ամենից հեռուն, ամենից խորը տեսավ, հասկացավ և իր իմաստուն միտքն առաջ. «Մենք, այսօրվա հայերս ու կառավարողները, պիտի դառնանք զրկանքների ու զոհողությունների կրողները հանուն ապագա ու ծաղկուն, անկախ Հայաստանի»: 'Իժրախտաբար, այս իմաստուն խոսքը շատերը չեն հիշում կամ չեն ուզում հասկանալ: Մինչդեռ այն կդառնար մեզ բոլորիս համար մխիթարանքի և տոկունության հզոր աղբյուր:

Վեհափառ Տերը ուներ նաև մի մեծ երազանք, մի հոգեկան չարչարանք, որն այդպես էլ չիրագործվեց, և նա գնաց սրտով ու հոգով խոռված: Դա Հայ Առաքելական Եկեղեցու երկու թևերի միավորման հարցն էր: Այդ թևերը այդպես էլ մնացին միմյանցից հեռու, չնայած նրա թափած բոլոր ջանքերին: Թո՛ղ չքը չկայացավ, երբ նույնիսկ նպաստավոր պահն ընձեռվեց մեզ:

Ես, նվաստս, որ ունեցա երջանիկ պատեհություն շուրջ 35 տարի լինելու Վեհափառ Հայրապետի աջակիցը, փորձեցի օգտակար լինել սկզբում որպես Մայր Աթոռի ճարտարապետական խորհրդի անդամ, և պա, 25 տարուց ավելի՝ նաև Մայր Աթոռ Սուրբ Էջմիածնի Գերագույն Հրգեկոր Խորհրդի անդամ: Նվիրումով ի նպաստ դրեցի համեստ գիտելիքներս Մայր Աթոռին, սիրեցի ու հարգեցի որդիական սիրով Վեհափառ Հորը և վայելեցի Հայրապետի գնահատանքը և սերը:

Այսօր ծնկի եմ գալիս, խոնարհում գլուխս Մեծ Հայրապետի աճյունի առջև և մեղավորս խնդրում Սմեռակարողին, որ նա բարոյաբար լինի իր իսկ ընտրյալի հանդեպ՝ հիշեցնելով իր Որդու՝ Քրիստոսի խոսքերը. «Ես չառացի, որ դուք չեք չարչարվի, ես չառացի, որ դուք չեք տանջվի, այլ ես առացի, որ դուք կհաղթեք»:

Տե՛ր, Վեհափառը հաղթեց,

Տե՛ր, գթա նրան:

ԳՐԻԳՈՐ ԽԱՆԶՅԱՆ